



**Sud Bosne i Hercegovine
Суд Босне и Херцеговине**

Broj: S1 3 P 038149 20 Iž
Sarajevo, 26.10.2020. godine

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Srete Crnjaka kao članova vijeća, odlučujući o žalbi Dijane Martićsa boravkom u Hrvatskoj 21223 Okrug Gornji ul. Trogirski br. 5A (kod Marije Lovrinović), koja osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 26.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020 .godine po podnesenim prijavama do 01.09.2020.godine jer nisu ispunjeni uslovi propisani odredbom člana 3.15 stav 1, 2 i 3 Izbornog zakona Bosne i Hercegovine.

Navedenom odlukom odbijena je prijava Dijane Martić koja je blagovremeno izjavila žalbu u kojoj je navela da je podnijela urednu prijavu za glasanje van BiH uz dostavljanje tražene dokumentacije. Predlaže da se uvrsti na spisak za glasanje putem pošte na adresi koju je navela u prijavi uz napomenu da je na isti način pravo glasanja ostvarila na Opštim izborima 2018. godine.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je žaliteljica uz prijavu za glasanje izvan BiH nije dostavila zakonom propisani dokaz o identitetu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije BiH kojom je odbijena prijava Dijane Martić za upis u izvod iz Centralnog biračkog spisa za glasanje izvan Bosne i Hercegovine jer imenovana uz prijavu nije dostavila važeći identifikacioni dokument. Time nisu ispunjeni uslovi propisani članom 3.15. stav 1 Izbornog zakona (Sl. glasnik BiH br.23/01 sa izmjenama) da se državljanin Bosne i Hercegovine koji privremeno živi u inostranstvu, nađe na izvodu Centralnog biračkog spiska za glasanje van zemlje budući da član 5.12 stav 4 istog zakona propisuje da je važeća lična isprava za birače, lična karta, pasoš i vozačka dozvola izdate u Bosni i Hercegovini.

Centralna izborna komisija Bosne i Hercegovine u osporavanom rješenju pravilno je utvrdila činjenicu da žaliteljica uz prijavu za glasanje izvan BiH nije dostavio ni jedan važeći zakonom propisani dokument o identitetu. Uz prijavu priložena lična karta izdata u Hrvatskoj, ne smatra se dokazom o identitetu predviđen Izbornim zakonom, te je prilikom odlučivanja CIK BiH pravilno primjenio zakonsku odredbu koja propisuje uslove za prihvatanje prijave za glasanje van BiH.

Navodi žaliteljice da je na Opštim izborima 2018. godine ostvarila pravo da joj se glasački materijal dostavi putem pošte, nema značaja iz razloga jer odredba člana 3.15 stav 1 Izbornog zakona propisuje obavezu državljanina BiH koji privremeno živi u inostranstvu, da za svake izbore Centralnoj izbornoj komisiji BiH podnosi prijavu za upis u izvod iz Centralnog biračkog spisaka za glasanje van BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA**

Dinka Bešlagić Čovrk